

NEWSLETTER

april 2022.



FONDACIJA
HASTOR

NOVOSTI

Održan sastanak s novim studentima stipendistima

Svake godine, još od svoga osnivanja, Fondacija Hastor u svoju porodicu sa zadovoljstvom prima nove članove. Putem Konkursa za dodjelu stipendija za redovne studente/ice na svim akreditovanim visokoškolskim ustanovama u Bosni i Hercegovini Fondacija Hastor na osnovu svojih Pravila i kriterija bira studente koji će zbog svoga znanja, interpersonalnih vještina i mnogih drugih faktora biti izabrani za naše stipendiste. Studenti svih akreditovanih visokoškolskih ustanova mogli su se prijaviti na Konkurs putem web-stranice Fondacije Hastor ukoliko su zadovoljavali kriterije da su: redovno upisani/e studenti/ice druge, treće ili četvrte godine dodiplomskog/bachelor studija, redovno upisani/e studenti/ice prve godine diplomskog/master studija, redovno upisani/e studenti/ce druge, treće, četvrte, pete i šeste godine integrisanog studija (ovo se odnosi na studente čiji integrirani studij traje pet i šest godina), tokom studija ostvarili prosjek ocjena 8.0 i više (3.5 ili više), da kandidat/kinja nije stariji/a od 24 godine te da kandidat/kinja nije primala stipendiju ili druge novčane pomoći za studiranje.



Ove godine Fondacija Hastor je zaprimila mnogo prijava te je Komisija za odabir stipendista imala težak posao pri selekciji kandidata koji će postati dio porodice Fondacije Hastor. Komisija je na osnovu pravila i kriterija za dodjeljivanje stipendija studentima izdvojila 42 novih stipendista koji će svojim angažmanom bilježiti kvalitetne sate volonterskog rada.

U subotu 9. aprila direktor Fondacije Hastor Seid Fijuljanin održao je sastanak s novim stipendistima. Dočekao ih je srdačnim pozdravima izražavajući zadovoljstvo zbog toga što postaju članovi naše velike porodice.

Na početku sastanka direktor je nove stipendiste upoznao s misijom i vizijom Fondacije Hastor koja već 16 godina djeluje na području čitave Bosne i Hercegovine. Osim toga, kao jedan od neodvojivih segmenata djelovanja Fondacije Hastor, predstavljen je i značaj volonterskog rada koji za cilj ima razvijanje i unapređivanje korisnih vještina te stjecanje dobrih i pozitivnih navika. Ovaj sastanak bio je prilika i da se novi studenti stipendisti detaljnije upoznaju sa svojim novim obavezama i odgovornostima kako bi ih u nastavku što kvalitetnije izvršavali.

NOVOSTI



Jedan od ključnih ciljeva Fondacije Hastor jeste da njeni stipendisti shvate važnost sopstvenog unapređivanja kroz rad s drugim ljudima te da uvide značaj i korist volontiranja za njihov razvoj i napredak, na šta im je, između ostalog, ukazano na ovom susretu.

Porastom broja novih studenata stipendista rastu i volonterski sati koje naši vrijedni stipendisti obavljaju svakodnevno i na taj način doprinose razvoju svojih lokalnih zajednica i cijelokupnog bosanskohercegovačkog društva. Radosni smo što naša porodica postaje svake godine sve veća i bogatija za nove mlade ljude koji će bit pokretači/inicijatori pozitivnih promjena te na taj način doprinijeti našem društvu.

STIPENDISTICA MJESECA

Fondacija Hastor može se pohvaliti marljivim, ambicioznim i uspješnim stipendistima koji ostvaruju zapažene rezultate na polju obrazovanja i nauke. Dakle, tim Fondacije čine mladi ljudi koji doprinose njenom radu, unapređujući ga svojim znanjem i vještinama. Upravo takve vrijednosti i predanost volonterskom angažmanu u okviru Fondacije Hastor iz mjeseca u mjesec stipendistima donose titulu Stipendiste mjeseca. U nastavku čitajte o stipendistici koja je tu titulu odnijela ovaj mjesec!

„Prava univerzalnost se ne sastoji u tome da se zna mnogo, već da se mnogo voli.“ – Jacob Burckhardt

Da svrha prave univerzalnosti nije da se zna mnogo podataka o različitim temama, već da se onom čime se bavimo pristupi s istinskom ljubavlju primjer je stipendistica Fondacije Hastor Aldina Hadžić koja je ovog mjeseca dobila laskavu titulu stipendistice mjeseca. Aldina je rođena u Travniku 1999. godine, osnovnoškolsko obrazovanje završila je u Jajcu, kao i Pravno-ekonomsku srednju školu. Kako ističe, Aldinina ljubav prema pravu rodila se još u srednjoj školi pa je svoje fakultetsko obrazovanje nastavila na Pravnom fakultetu Univerziteta u Sarajevu. U akademskoj 2020/2021. godini uspješno je diplomirala te time stekla zvanje bachelor prava. Naša se Aldina trenutno nalazi na drugom ciklusu studija na Katedri za pravno-ekonomske nake.



Stipendistica je Fondacije Hastor već jedanaest godina. Istimje kako je kroz dugogodišnje iskustvo stipendiste kao i kroz volonterski rad s najmlađim stipendistima u prethodnih pet godina stekla mnogobrojna poznanstva, iskustva i vještine za šta smatra da će joj od izuzetnog značaja biti u daljem životu i radu.

Aldina naglašava kako je pored fakulteta i fakultetskih obaveza važno izdvojiti svoje vrijeme za pomoć onima koji su u potrebi. To redovno pokazuje na vlastitom primjeru realizacijom ovog principa kroz volonterski rad u lokalnoj zajednici, gdje je implementirala ideje o zaštiti okoliša i pomoći starijima, a uz sve to je pružala instrukcije iz nastavnih predmeta.

Kada su u pitanju određeni afiniteti, Aldina kod sebe posebno ističe ljubav prema prirodi pa su ideje poput sadnje drveća, uklanjanje otpada te zaštite biljnih vrsta ono što često realizira u slobodno vrijeme. Pored toga, u slobodno vrijeme voli i da igra odbojku, a poeziju piše još od osnovne škole. Na ovaj način Aldina upotpunjuje ideju o svestranosti i već od malih nogu zagovara neophodnost različitih interesovanja i usmjerenja kako bi čovjek bio što uspješniji i svjetlu ponudio najbolju verziju sebe.

Naša Aldina je zainteresovana i za savremene tehnologije te smatra da je u 21. stoljeću imperativ biti u koraku s vremenom i biti upoznat sa savremenim dostignućima. Upravo zbog toga i sama, kada god za to ima priliku, uči o kreativnom, efikasnom sigurnom korištenju tehnologije ili pohađa neki kurs. Jedan od kurseva koji je Aldina posebno istakla, a koji je i uspješno završila, je o cyber sigurnosti. Ova tema je za nju posebno značajna i interesantna te je rado uključi kao dodatnu temu kada volontira sa svojom mentorskog grupom.

STIPENDISTICA MJESECA

Aldinina ljubav prema poeziji je rezultirala učešćem na mnogobrojnim poetskim takmičenjima, a na jednom je nastupila s navedenom pjesmom:



Esma sultanija

Kada se razboljela sultanija Esma
Počela je lijeka da svom bolu traži
Zbog toga se obrati mnogim astrolozima
Da bi našla pravi lijek da bol ublaži.

Tri hajrata lijek njen su bili
Dvije čuprije i jedna džamija
Tamo gdje se mrzi, voli i moli
I gdje jedna rijeka drugu rijeku grli.

Posluša sultanija sve potrebne savjete
Pa je nakit svoj zbog toga prodala
Da u gradu Jajcu izgradi hajrate
I učini dobra djela da bi ozdravila.

Izgradiše se svi njeni hajrati
Te ozdravi i opaku bolest ona pobijedi.
A kad svijet napusti u dubokoj starosti
Ostavi nam u amanet ono što izgradi.




O ulozi Fondacije Hastor tokom njenog obrazovanja i života uopće Aldina kaže:

Uloga Fondacije Hastor u mom životu i obrazovanju je nemjerljiva. Pored finansijske posebno mi je značila moralna podrška te volonterski rad. Kao član ove velike porodice imala sam mogućnost da prisustvujem predavanjima uspješnih ljudi tokom mjesecnih sastanaka te da upoznam mnoge mlade i obrazovane ljudi iz naše države. Sve to je predstavljalo jedan vjetar u leđa ka postizanju što boljih rezultata u svim segmentima obrazovanja i volonterskog rada. Inspirativne priče i nova prijateljstva su ono što će ostaviti vječiti trag Fondacije u mom životu.

RAM – RUBRIKA AKTIVNIH MLADIH

RAM je, prema definiciji, radna memorija računara. U Bosni i Hercegovini „radna memorija“ su upravo proaktivni i marljivi mladi ljudi koji su svojim djelovanjem primjer društva koje naša država treba. Kroz ovu rubriku predstaviti ćemo aktivne i mlade stipendiste Fondacije Hastor koji pored volontiranja rade fenomenalne stvari i tako predstavljaju Fondaciju u najboljem svjetlu!

Majra Šišić



Majra Šišić, jedna od najaktivnijih stipendistica Fondacije Hastor, po riječima je iz Kaknja. Majra pohađa četvrtu godinu studija fizike, smjer Teorijska fizika na Prirodno-matematičkom fakultetu u Sarajevu. Stipendistica je Fondacije Hastor već dvije godine.

Što se tiče aktivnosti i volontiranja, još od prve godine studija aktivno učestvuje u aktivnostima Društva fizičara u FBiH. Konkretno, svake godine po nekoliko puta jedan je od glavnih organizatora kampova i škola fizike za učenike osnovnih i srednjih škola te je na istima i predavač. To budu škole za nadarene učenike, gdje uče fiziku mnogo više nego na redovnoj nastavi i gdje se pripremaju za takmičenja. Kroz organizaciju ovih kampova Majra je naučila dosta toga, kako napraviti materijale za promociju (flyere, postere, objave na Facebooku...), praviti rasporede, koordinirati većom skupinom ljudi i sl.

Također, pored organizacije i predavanja na kampovima fizike, ona drži pripremne nastave za učenike koji se kvalifikuju da predstavljaju BiH na nekim internacionalnim takmičenjima iz fizike. Dakle, na osnovu federalnih i državnih takmičenja njene kolege i ona dobiju tim „najboljih“ učenika (tj. najspremnijih za tu godinu) koji će predstavljati BiH na raznim svjetskim olimpijadama iz fizike. Prethodne dvije godine Majra je bila vođa ekipe za Balkansku olimpijadu iz fizike. Na obje olimpijade ostvarili su odlične uspjehe! Naime, 2020. godine osvojili su zlatnu medalju za BiH, prvu ikada osvojenu iz nekog internacionalnog takmičenja iz fizike, a godinu nakon su također osvojili jednu zlatnu medalju. Ovaj uspjeh smatra posebno velikim jer je kao lider ekipe mjesec dana intenzivno radila s učenicima. Ovo je jedna od aktivnosti na koju je Majra najponosnija.

Zašto sam baš odlučila da radim za Društvo fizičara i na koji način me to ispunjava? Pa, dakle, za fiziku i matematiku sam oduvijek imala velike afinitete. Ja sam se također takmičila još od osnovne škole i znam da mi je uvijek bilo malo to što naučim samo u školi. Takvih učenika ima mnogo i, nažalost, naš obrazovni sistem je nekako prilagođen masi, tj. prosječnom učeniku, ne posvećuje se pažnja učenicima koji su posebno nadareni za bilo koju oblast. Kroz rad u Društvu fizičara pokušavam na to utjecati. Kroz naše kampove učenici zaista imaju priliku mnogo toga da nauče, da steknu prijatelje iz cijele BiH i šire i sl. i to je do sada pokazalo odlične rezultate, naši učenici svake godine sve više napreduju. Dosta njih se uspije upisati na prestižne fakultete u Bosni i Hercegovini i svijetu. Također, ja uistinu volim da predajem i svoje znanje širim dalje, pa je i to jedan od razloga zbog kojeg me ovaj rad ispunjava. Činjenica je i da sam zaista mnogo toga i naučila, ne samo u vezi s onim što se tiče isključivo moje oblasti nego i razne druge vještine (socijalne, informatičke, ekonomiske).

RAM – RUBRIKA AKTIVNIH MLADIH

Pored Društva, ove godine počela je da se aktivno bavi radom na projektima na fakultetu. Naime, trenutno s asistentom radi naučni rad na temu „Odd and even harmonic generation from CO and NO molecules by bi-elliptical orthogonally polarised two-coloun field“. Za sada ide odlično i svoj rad će prezentirati na Naučnoj konferenciji u Sarajevu, „PSYCONBA 2022.“, koja će trajati od 30.6. do 1.7.2022. godine. Također, daje zadatke i učestvuje kao član takmičarske komisije na federalnim i državnim takmičenjima iz fizike. Naučni rad na kojem radi izdvaja kao još jedan uspjeh na koji je izuzetno ponosna iako voli kazati da je ponosna na sve što je postigla u životu.

Smatram da je veoma važno da mladi ljudi budu aktivni u društvu! Svako od nas ima svoj talent i svoju priču. Kada bismo pojedinačno posvetili makar mali djelić svoga vremena da taj talent iskoristimo na društveno koristan način, zamislite koliko bi se naše društvo u cijelosti unaprijedilo.

Ljudi često kažu da nemaju vremena za volontiranje i društveno koristan rad, međutim, uz dobru organizaciju vremena ništa nije nemoguće. Ja sam ove godine završna godina fakulteta i pored toga imam razne aktivnosti koje sam iznad navela, a od ove godine sam i u administrativnom timu Fondacije Hastor pa i tu imam mnogo više obaveza negoli sam imala ranije. Međutim, opet uz dobru organizaciju imam vremena i za razne slobodne aktivnosti i hobije kao npr. planinarenje, trčanje i sl. kojima se zaista aktivno i rado bavim.

Majra izdvaja da je Fondacija Hastor značajno utjecala na to da uvidi koliko je važno volontirati i pomagati drugima. Kroz rad i volontiranje u Fondaciji shvatila je koliko u Bosni i Hercegovini imamo učenika svih uzrasta kojima je potrebna pomoć. Tu, naravno, ne misli samo na finansijsku, nekome je potrebna samo lijepa riječ, da mu posvetite pola sata svoga dana, da popričate s njim, saslušate ga, nekome su potrebne instrukcije iz nekog predmeta, a nekome pomoći oko nekog posla.

Naćini na koje možemo pomoći drugima su zaista beskonačni samo ako znamo kako i kuda trebamo gledati. To je ono što me je Fondacija naučila.

Ono što Majra poručuje drugim stipendistima Fondacije je da nastave marljivo raditi i truditi se jer se zaista svaki rad i trud isplati, ali sve ono što radom i trudom postignemo za sebe, postaje potpuno tek kada se podijeli s drugima! I tek tada pričinjava neko posebno zadovoljstvo. Nemojmo biti škrti u dijeljenju svoga talenta i znanja s drugim ljudima jer se dobro dobrim vraća.

ALUMNI MJESECA

Čak i nakon završetka školovanja svaki stipendista Fondacije Hastor ostaje važan dio njenog kolektiva. Na uspjehu bivših stipendista Fondacija je oduvijek gledala s ponosom jer je i sama makar jednim dijelom do-prinijela njihovom ostvarivanju. U nastavku donosimo priču bivše stipendistice Emine Sijahović, koja danas radi kao asistent na Poljoprivredno-prehrabrenom fakultetu u Sarajevu.

Njena priča počela je u Novom Šeheru kod Maglaja, gdje završava osnovnu školu, a potom i Opću gimnaziju „Edhem Mulabdić“ u Maglaju. Nakon gimnazije upisuje Poljoprivredno-prehrabreni fakultet Univerziteta u Sarajevu na kojem diplomira na Odsjeku za biljnu proizvodnju, smjer Voćarstvo i vinogradarstvo. Na trećoj, završnoj godini I ciklusa prijavljuje se na konkurs za stipendiju Fondacije Hastor koju nakon obavljenog intervjua i dobija.



Na razgovoru za stipendiju njih je najviše zanimalo kako sam uopće došla iz malog mjeseta u Sarajevo da studiram kada mi roditelji nemaju nikakvih primanja. Objasnila sam da je mama krojačica, da ima mašinu kući i da uvijek ima ponešto da odradi na toj mašini. Otac se bavio poljoprivredom tako da smo prodavali mljeku i drva pa su se nekako usudili da me pošalju na studij jer ja, kao odlikaš u gimnaziji, nisam imala nikakve druge planove.

Iako je prvobitno u razgovoru s roditeljima Emina imala namjeru završiti samo I ciklus studija i zaposliti se, iz iskustava starijih kolega znala je da su za to male vjerovatnoće čak i za najbolje studente I ciklusa, stoga odlučuje nastaviti školovanje na Odsjeku za floristiku i pejsažno projektovanje koji završava i dobija „Zlatnu značku“, počasno priznanje Univerziteta u Sarajevu, kao najbolji student na II ciklusu studija. Stipendistica Fondacije Hastor bila je pune tri godine, ali volonter i puno duže. Tokom svog volonterskog rada u Fondaciji volontirala je s učenicima osnovne i srednje škole iz Maglaja, bila član redakcije i član administrativnog tima Fondacije.

Nekoliko puta sam imala najveći broj sati na terenu. Tokom volontiranja u kancelariji, stipendistima širom Bosne i Hercegovine pisali smo pisma, u kojima smo ih poticali na izvrsnost, empatiju i rad na sebi i svom obrazovanju, davajući im lične primjere kako siromaštvo, daljina, različitost ne mogu i ne smiju biti prepreka na njihovom putu ka ljepšoj budućnosti. Toliko sam uživala u tom zadatku, da sam jednom za jedan dan napisala i poslala 70 pisama. Kasnije, na fakultetu upoznala sam stipendistu, koji mi je rekao da sam mu baš ja pisala pisma dok je bio u srednjoj školi i da je tada i on odlučio da upiše moj fakultet. Danas smo prijatelji i on je zaposlen u struci.

Emina navodi da nakon završenog studija, uprkos svim nagradama i pohvalama, nije bilo lako pronaći prvi posao bez radnog iskustva, ali ni tu podrška Fondacije Hastor nije izostala.

Organizovali su nam dvomjesečnu obuku „Program razvoja pripravnika“ sa zaista stručnim predavačima koji su nas pripremali za ulazak u poslovni svijet te nam pružili šansu da odradimo jedan mjesec volonterskog rada u kompanijama s kojima su imali dobru saradnju. Čini mi se da je tad bilo nas 14 stipendista koji su završili svoje formalno obrazovanje i dobili tu priliku da se okušaju u različitim kompanijama na mjesec dana. S obzirom na to da Fondacija ima samo najkvalitetnije stipendiste, neki od tih ljudi i dan-danas rade u tim kompanijama.

ALUMNI MJESECA

Emina je dobila priliku da radi u „Coca-Coli“, na odjelu za kontrolu kvaliteta pića, gdje su bili veoma zadovoljni njenim radom pa su joj produžili ugovor na dodatnih 6 mjeseci. Nakon toga je dobila priliku da radi kao agronom u kompaniji „ITC“ u Zenici, što je bilo bliže njenoj struci. Danas je zaposlena kao asistent na Poljoprivredno-prehrambenom fakultetu, gdje je i na završnoj godini doktorskog studija. Osim svog primarnog zaposlenja bavi se projektovanjem i izgradnjom vrtova, što je, kako kaže, njena najveća ljubav.



U tom poslu mogu da izrazim svu svoju kreativnost, stalno sam u kontaktu s biljkama i prirodom, što mi održava energiju, puni baterije ali i pruža neki vid slobode, širi horizonte jer je to posao u koji mogu da utkam znanje stečeno kroz formalno obrazovanje, ali i neki lični doživljaj.

Najvažnije što je naučila uz Fondaciju Hastor, odnosno ljudе koji su je vodili i bili njen dio jeste disciplina, samopouzdanje i pravilno slaganje prioriteta u životu. Kaže kako je prije nego što je postala stipendistica bila stidljiva djevojčica koja skoro nikada nije imala hrabrosti da glasno izrazi svoje mišljenje niti da obavlja stvari kako ona misli da treba. Danas, na ličnom primjeru osjeća da je Fondacija ispunila svoj cilj, a to je da svi njeni stipendisti postanu samosvjesne ličnosti kroz obrazovanje, da budu jaki kroz svoj individualni rad, ali istovremeno i da budu snažna karika u timskom radu, da budu odlučne i uporne osobe s dobrim komunikacijskim i prezentacijskim vještinama kao i sposobnošću da nepredviđene situacije u životu pretvore u važan element motivacije.

Moja poruka trenutnim stipendistima jeste da budu pravi ambasadori Fondacije Hastor i izgrade u sebi ove vrijednosti te da ih primjenjuju kad god i gdje god imaju priliku za to jer naše je samo to što damo. Volontirajte, upijajte, učite, možda upravo to sutra bude vaša komparativna prednost na tržištu rada!

Nakon stečenog prvog radnog iskustva, doživjela je da istovremeno bude zaposlena u dvije kompanije.

Sve to ponajviše zbog radnih navika koje sam usvojila u Fondaciji od kojih bih izdvojila tačnost, sve se mora završiti i prije roka, efikasnost, nije važno koliko nego kako... U Fondaciji smo učili kako se pravilno odlažu košuljice u registrator, što nam je tad možda zvučalo kao absurd, ali kasnije, na poslu, kad je kod kolegice cijeli tender ispaо iz registratora jer je košuljice stavljala s otvorom na dolje, vidjela sam koliko znače sitnice i koliko je sve što smo učili u Fondaciji ustvari primjenjivo.

Tvrdi da su sklopljena prijateljstva definitivno jedna od najljepših stvari koja joj se desila u Fondaciji. Stekla je najbolje prijatelje, prijatelje s kojima se i danas druži, ljudе različitih nacionalnosti iz različitih gradova koji su jedni drugima velika podrška.

Neprocjenjivo je kad se nađete u Mostaru, Bihaću, Goraždu, Livnu, Banjoj Luci, a imate koga zvati na kafu, imate gdje prespavati i kvalitetno provesti vrijeme. To je ta širina koju nam je pružila Fondacija Hastor za koju me zaista vežu najljepše uspomene. U današnjem svijetu lijepo je imati nekoga na koga se uvijek možete osloniti bez obzira na to koliko godina imate i gdje se nalazite. Meni je Fondacija to, a vjerujem da sam i ja njoj.

ZANIMLJIVOSTI

Kaligrafija

Umjetnost je, kako mnogi autori kažu, izraz duha ličnosti. Prema tradicionalnom poimanju, u umjetnosti je neophodno prisustvo estetskog elementa.

Na istoku se, kao jedan poseban oblik umjetnosti, javila i kaligrafija. Prvim začecima kaligrafije smatraju se primjeri u drevnoj Kini 4000 godina prije nove ere. Oni su nastali rezbarenjem znakova u ovnove robove ili kornjačine oklope kao rezultat spoja slikarstva i potrebe za komunikacijom.

Danas postoji nekoliko vrsta kaligrafije koje su svojstvene određenom geografskom prostoru. Tako imamo indijsku, tibetansku, arapsku, istočnoazijsku, perzijsku, a po uzoru na njih razvilo se i zapadno poimanje ove umjetnosti.

Njen najčešći izraz danas nalazimo u arapskim zemljama, gdje je dominantna orijentalno-islamska kultura. Ona se vezuje za arapski alfabet ili, kako se u arapskom jeziku nazivaju slova, harfove. Prethodne godine je Organizacija Ujedinjenih naroda za obrazovanje, nauku i kulturu dodala kaligrafiju, ključnu tradiciju arapskog i islamskog svijeta, na svoj popis nematerijalne kulturne baštine.

Sa stanovišta umjetnosti, arapska kaligrafija bila je poznata i cijenjena zbog svoje raznolikosti i velikog potencijala za razvoj. Zapravo, ona je u arapskoj civilizaciji bila povezana s raznim poljima kao što su religija, umjetnost, arhitektura, obrazovanje i zanatstvo. Sva ova polja imala su važnu ulogu u njenom napretku. Šest poznatih vrsta kaligrafskog pisma su: sulus, nesh, muhakkak, rejhani, tevki i rika' zajedno se nazivaju aklami sitte (šest pera). Kaligrafsko pero podsjećeno je ukoso i od njegove širine i kosine vrha zavisi veličina napisanog harfa. S kaligrafijom su usko povezani minijaturno slikarstvo i umjetni zanati, posebno knjigovrstvo, tauširanje, rezbarstvo, keramika i sl.

Ono što je posebno interesantno jeste upotreba kaligrafije u pisanju fermana (naredbi) sultana u Osmanskom carstvu. Za te potrebe koristio se samo divani rukopis jer ga gotovo нико nije mogao pročitati osim onih izuzetno obučenih za to. Na taj način su se rukopisi sultana u vidu naredbi čuvali od mogućih skrnavljenja.



OBJEKTIV



Amir Vrabac



Sanjin Rožajac



Amina Bukvarević



Sedina Burić



Nejla Pljakić

POETSKI KUTAK

Plamen radosti koji ne gasne

Samo jednom se prvi put grli mama
i papir bijeli raznobojno šara.
Samo jednom se prvi put srce slama
I prva riječ izgovara.

Svaki sljedeći
Je put ko put
Svaki korak je znan
I već poznaš osjećaj koji nekad bijaše stran.

Prostranstvu mora radovah se
Samo kad mi je oko prvi put tragalo za njegovim daljinama
I nikad više nisam dotakla radost i strah
Prvog plivanja u dubokim vodama.

Staze kojima prvi put prolaziš su uvijek teške
Ali samo dok njima ne hodiš izgledaju neprohodne.

Sve te radosti susreta s neznanim
Iščeznu kroz sat ili dva
Osim jedne.

Pogled u oči tvoje
Svaki put postaje prvi
I budi radost
Damara mojih.
One me tjeraju da zaboravim
Sve sreće stare
I zatvaraju istošene ormare neznanog.
Samo one
Svaki put iznova
Zbune moja osjetila
Iako srce zna
Da te stoput poznalo
Po tim očima
S kojima mi je svaki susret
Poput prvog – nestvaran.

Nedžma Latić

